

SANCTISSIMI DOMINI NOSTRI
CLEMENTIS

DIVINA PROVIDENTIA


PAPÆ XIV.

ALLOCUTIO


HABITA

IN CONSISTORIO SECRETO


Die xxiv. Septembris MDCCLXX.



ROMÆ, MDCCLXX.



Ex Typographia Rev. Camerae Apostolicæ .



VENERABILES FRATRES.



ON sine divino consilio evenisse putamus, Venerabiles Fratres, ut quæ Vobis significare die vigesima hujus mensis decreveramus, ad hodiernam diem differre debuimus. Hæc enim dies illa est, qua sex ab hinc lustris Noster in Urbem adventus Nostrorum tum Superiorum voluntate decretus fuit, auctoritateque ac jussu confirmatus. Hæc ipsa est dies, qua licet immeriti prorsus, ac renuentes, huic vestro Sacræ Romanæ Ecclesiæ Cardinalium Collegio adscripti fuimus. Hæc postremo dies illa nunc est, quam elegit Dominus, ut exulemus, & delectemur in ea.

Quod enim certissime confidebamus, Venerabiles Fratres, Vobisque receperamus, futura cumulatione in dies præclara illa Carissimi in Christo Filii Nostri JOSEPHI Por-

tugalliæ & Algarbiorum Regis Fidelissimi in Nos studia, ejusque novis atque illustrioribus pietatis indiciis, ac in Ecclesiam meritis Nos una Vobiscum perpetuo lætatu-
ros, reipsa fuit id jam apertissime luculentif-
simeque comprobatum. Amplas ipsas spes pollicitationesque nostras, pleniores etiam sunt atque uberiores rerum exitus consecuti. Egregia pristina illa inter Nos Regem-
que Fidelissimum non solum est redintegrata necessitudinum officiorumque omnium con-
suetudo, verum etiam admirabili quodam caritatis ac pietatis consensu major, quam unquam antea fuerat, stabilita ac roborata conjunctio. Cum hæc Vobis futura prædi-
ceremus, non incerta atque ex cupiditate ac desiderio nostro profecta divinatione, sed intimo ac firmissimo quodam judicio movebamur, gravissimis causis summaque ratione suscepto. Maximum ac certissimum habebamus fiduciæ omnis nostræ initium ac fundamentum, ipsum Carissimi in Christo Filii Nostri jampridem Nobis tot veris-
simis indiciis declaratum animum, illius religionem, pietatem, fidem cum singularibus suis, suorumque Majorum, totiusque Regiæ Domus in hanc S. Sedem studiis conjunctam.

Sed quanquam in hæc intuentes optimos rerum omnium eventus jam tum cogitatione præciperemus, tamen allato nuper e Lusitania faustissimo nuncio tam inusitata ac tam incredibili jucunditate perfusi sumus, ut si nova, ac inexpectata ista Nobis accidissent, majorem capere lætitiæ fructum non potuissemus. Hoc verissime Vobis affirmamus, illo auspiciatissimo die nullum unquam Nobis neque jucundiorum illuxisse, neque lætiorum diem. Uno eodemque tempore obversabantur animo hæc omnia: optimi Regis eximia ac singularis virtus, hoc præstantissimo opere immensa ad immortalem ejus nominis gloriam facta accessio, Ecclesiæ utilitas, Apostolicæ Sedis dignitas, omnium bonorum plausus, ac in Vos potissimum summa inde redundatura lætitia. Quæ singula ingentem jucunditatis causam afferebant, universa summi gaudii nostri magnitudinem mirum in modum cumulabant.

Cujus igitur sapientia, religione, atque erga Nos pietate hæc est animorum in Nos perfecta jucunditas, quanta alacritate, qua mentis contentione danda a Nobis erit opera, ut eidem Nos memores, ut gratissimos, ut illius felicitatis, ac gloriæ cupidissimos declaremus? Quæ caritatis, atque amoris studia, quæ laudis, honoris, atque existimationis ornamen-

ta in eundem erunt conferenda, quem gloriosissimi clarissimique facti Auctorem esse agnoscimus? Sed in commemorandis egregiis illius de Nobis meritis minime sunt ab ipso disjungendæ Carissimæ in Christo Filiae Nostræ MARIÆ ANNÆ VICTORIÆ illius præstantissimæ optimæque Conjugis Reginae Fidelissimæ laudes. Cum illa eximiam Regis æmulata voluntatem singularibus studiis exarserit, ut de Nobis, ac de Ecclesia universa præclarissime mereretur, suæque in Nos pietatis hoc præcipue tempore illustriora monumenta posuerit, summis a Nobis est & immortalibus commendationum & gratiarum actionibus exornanda. Pari præterea animo in omnem Regiam Nobisque dilectissimam Domum affectos Nos esse oportet, cujus ad veteres præcellentes virtutes accedunt inde nova nunc ac maxima gloriæ, & in Nos meritorum incrementa. Quæ vero & quanta esse debet nostra etiam de dilecto Filio nobili Viro Comite de Oeyras Fidelissimi Regis Secretario Status laudum atque honorum prædicatio? Cujus præter ceteras commendationes nunc maxime illustria erga Nos studii atque observantiæ, & erga Regem singularis obsequii ac fidei testimonia extiterunt. Perhonorifice itidem est a Nobis nuncupandus dilectus Filius nobi-

lis Vir Commendator de Almada ejusdem Regis apud Nos Minister Plenipotentarius, quem pios ac præclaros Regii Animi sensus ad Nos sæpe deferentem perlibenter excipimus, quemque ob suam in eo perfungendo munere operam ac diligentiam plurimi facimus. Demum omnes Regiæ Civitatis Ordines, ac omnis Ulysiponensis Populus, qua erga Nos, & hanc Beati Petri Cathedram intima animi devotione flagraret, eximie gaudio illo, ac pene triumpho declaravit, quo elatus ac inflammatus fuit, cum Regis exemplo, ejusque sapientissimo facto ac ab omni posteritate commemorando ad suam erga Apostolicam Sedem palam expromendam pietatem excitaretur.

Quæ quidem omnia Vobiscum, Venerabiles Fratres, pro ea quæ inter Nos est conjunctione, communicanda nunc duximus, ut diffusiores ac splendidiores quodammodo lætitiâ hanc nostram faciamus. Præstantissimo hoc Fidelissimi Regis opere existimate jucundissimum Vobis esse munus impositum, ut gratam vestram, atque in illum studiosissimam voluntatem publicis etiam lætitiæ signis præferatis, ut omni laudum genere illum pro tam insignibus meritis prosequamini. Sed illam unam præclarissimam atque expeditissimam gratiæ referendæ viam

esse putate, si Dei benignitatem pro ipsius incolumitate, Regiæque Domus gloria, Regni-
que felicitate deprecari nunquam desistatis.

Nos profecto in id maxime semper incumbemus, ut in dies magis possit, quanta in ipsum sit caritatis, studii, atque amoris nostri magnitudo, cognoscere. Interea Deo Opt: Max: pro collato Nobis suæque Ecclesiæ tam excellenti beneficio, quantas maximas possumus, gratiarum laudes publice persolvemus. Illuc vero summa paterni animi contentione effusissimas nostras ad Deum preces assidue dirigemus, illuc etiam Populi hujus Fidelissimum Regem, ac omne Lusitanum nomen summis laudibus extollentis, universæque Almæ Urbis Nostræ miro gaudio elatæ vota convertemus, ut quanto ampliora sunt optimi Regis de religione merita, tanto auctiores suas sui-que Regni fortunas atque copias, & veræ ac solidæ gloriæ fructus divinæ gratiæ munere locupletiores esse intelligat.

